



Il vitg da Segl cun las fracziuns da Segl-Baselgia (davantvart) e Segl-Maria.



FOTO R. CANAL Impressiun dal Lej da Segl. (PD)

# En la regiun dals Lais da l'Engiadin'Ota

Las vischnancas da Silvaplana e Segl

■ La regiun dals Lais da l'Engiadin'Ota cumpiglia il Lej da San Murezzan, il Lej da Champfèr, il Lej da Silvaplana ed il Lej da Segl. Aval vegn la regiun cunfinada da San Murezzan, vers nordvest maina il Pass dal Güglia da Silvaplana en il Surses. En il sidvest furma il Pass dal Malögia il cunfin topografic vers la Bregaglia. Il cunfin politic e linguistic è dentant situà amez il Lej da Segl: Malögia, la fracziun da la vischnanca da la Bregaglia situada en la part superiura dal lai, cumpiglia ils anteriurs lieus da stad dals purs da Stampa (Malögia, Isola, Capolago, Pila ed Orden) e l'enconuschent Maloja Palace ch'è vegnì erigì il 1882–1884.

## Silvaplana (Silvaplana)

Vischnanca politica, circul Engiadin'Ota, district Malögia, situada tranter il Lai da Silvaplana ed il Lai da Champfèr sin il delta da l'Ova da Vallun che nasha al Pass dal Güglia, tudestg Silvaplana (uffizial). A la vischnanca (4477 ha) appartegnan ils aclauns da Surlej ed Albana sco era ina part da la vischnanca da Champfèr al vest da l'Ova da Suvretta. 1804 348 abitants; 1850 205; 1900 319; 1950 333; 1970 714; 2000 913. Fragments da colonnas romanas sin il Pass dal Güglia. Il 1356 è menziunada per l'emprima giada ina baselgia, reconstruida il 1491 en il stil gotic tardiv. Refurmaziun 1556. La baselgia catolica, deditgada a s. Maria, è vegnida costruida il 1962. Dapi il temp roman è Silvaplana in'impurtanta vischnanca da pass. Schlargiamet da la via dal Güglia, svilup dal turissem en l'Engiadina e construcziun d'ina ovra electrica en il 19avel tschientaner. Il dumber da manaschis purils è sa diminui a Silvaplana da 24 il 1806 a trais il 2000. Il 1960 ha inizià in boom da construcziun. Ultra da numerus hotels (2004 org hotels, quatter hotels d'appartaments) ha la vischnanca obtegnì in parcadi sutterranean per 300 vehichels, in sviament parzial ed ina serenera sutterranean. Silvaplana è sa sviluppà ad in center apprezzà da navigatur a vela, deltists e surfists; la vischnanca offra ultra da quai era arranschaments en connex cun il Cup mundial da surf. Il 2000 lavuravan 75% da las persunas activas a Silvaplana en il terz sectur. Part da la populaziun da lingua rumantscha: 1880 73,3%; 1941 54,9% (lingua materna); 2000 10,6% / 34,7% (meglra lingua / tuttas indicaziuns).

Ottavio Clavuot

## Surlej

Aclaun da la vischnanca politica da Silvaplana, situà da la vart dretga da la val al pe dal Piz Corvatsch. 1786 40 abitants; 1804 34; 1900 6; 2000 164. Colonisaziun a partir dal 14avel tschientaner.



Silvaplana, vista dal nordost. (Litografia da ca. 1820)

ner. Destruì il 1772, 1793, 1834 e 1868 tras auazuns da l'Ova da Surlej. Ils relicts da la chaplutta da S. Niclè èn vegnids sbuvad il 1955. Il 1906 ha in general tudestg von der Lippe laschà construir a la riva dal Lai da Silvaplana il chastè dal Crap da Sass. L'avertura dal territori da skis dal Corvatsch (1963) ha provocà in boom da construcziun a Surlej. La Fundaziun Pro Surlej ha impedi in'extensiu da la zona da construcziun fin a la riva dal lai. En ils onns 1990 han exchavaziuns da las uschenumnadas Ruinas purtà a la glisch mirs da chasas e da stallas che dateschan per part dal 14avel tschientaner.

Ottavio Clavuot

## Sils (Segl)

Vischnanca politica, circul Engiadin'Ota, district Malögia, cun las fracziuns da Segl-Maria, Segl-Baselgia, Fex e Grevasalvas. 800–850 Silles; 1131 Silles, tudestg Sils (uffizial Sils im Engiadin/Ota). 1850 219 abitants; 1900 178; 1930 359; 1950 262; 2000 751. Quatter pitschens altars votivs da lavetsch, scuverts il 1964 a Segl-Baselgia, renvieschan ad in sanctuari che stat en connex cun la colliaziun romana sur il pass dal Malögia e dal Güglia. Relicts da mirs dattan perditga da l'implant d'in chastè sin la penisla da Chastè al Lai da Segl. En il temp medieval furmava Segl ina susta a la ruta dals pass surmenziunads che steva dentant solitament en la sumbriva da quella dal Set. In urden d'alp datescha dal 1545. Gia il 1591 possedeava Segl agens statuts communs en lingua rumantscha. La baselgia da S. Luregn a Segl-Baselgia, che derivava probablmain dal temp medieval, è attestada il 1536. Il 1597 è vegnì erigì a Segl-Maria, betg lunsch davent da la

baselgia da S. Mitgel (documentada il 1496), in nov edifiz (renovà il 1764). La refurmaziun ha gi lieu il 1552. La baselgia catolica da Cristus-Retg è vegnida consecrada il 1931. In'impurtanta funtauna d'entrada ha furmà a partir dal temp medieval tardiv la pestga respectivament in'export da litgivas ensaladas e fimentadas en l'Italia. A Plaz, sur il Lej Giazöl, èn vegnids explotads vers la fin dal 17avel tschientaner sulfids da plum e da zinc. Dal 17avel fin vers la fin dal 20avel tschientaner han purs da la Bergiaglia utilisà ils bains da Grevasalvas sco aclas. L'emigraziun en il 19avel tschientaner ha purtà bainstanza. Segl ha prendì viva part al turissem en svilup. L'Hotel Waldhaus (1908) è vegnì frequentà da litterats, artists, musicists e filosofos. La chasa, en la quala Friedrich Nietzsche ha abità dal 1881–88, è d'entada il 1960 il Museum Nietzsche. Dapi il 1908 circuleschan bartgas per turists sin il Lai da Segl. Cun la construcziun da las pendicularas Segl-Furtschellas han ins avert il paradìs da viandar en las muntognas da Segl er al turissem da skis, provocond ina grond'activitad en il sectur da construcziun. Il 1962 è vegnida fundada la Biblioteca Engiadinaisa (biblioteca populara). Il 1994 han ins avert la nova chasa da parc e serrà la vischnanca da Segl per il traffic d'autos. La protecciun dal lai e da la cuntrada da Segl ha inizià en ils onns 1920 ed ha manà il 1947 a la fundaziun da la Cumünanza Pro Lej da Segl che cumbatta la speculaziun fin il di dad oz. Il 1995 è vegnì fundà il Museum Robbi en onur dal pictur indigen Andrea Robbi. Il 2000 han inditgà 59% dals abitants da Segl il tudestg, 15% il talian e 12% il rumantsch sco lingua

principala, 33% sco lingua discurredda regularmain a chasa, en scola ed a la lavur.

Ottavio Clavuot

## Fex

Val e fracziun da la vischnanca politica da Segl, cun las culegnas da Väüglia, Platta, Crasta, Vals e Curtins. 1303 Fedes, 1411 Feytz. 1850 74 abitants; 2000 101. En il 12avel tschientaner probablmain utilisada dals Engiadinais per pascular nursas e muvel bovin. Dapi il temp medieval tardiv cultivada da purs da la Bergiaglia ch'eran s'installads qua temporarmain per far fain. En il 14avel tschientaner è la Val Fex attestada sco vischinadi, il 1477 ensem cun Segl, il 1538 sco part da Segl. En il 17avel e 18avel tschientaner pon ins registrar in'emigraziun (limitada), provocada tras la midada climatica. La baselgia da S. Margareta datescha da la fin dal 15avel tschientaner. Refurmaziun 1552. Exploataziun da plattamorta fin il 1964. Il 1878 è vegnì destruid l'emprim hotel a Fex. L'onn 2000 dumbava la val dus hotels, duas pensiuns e trais manaschis purils a la natira. La Pro Fex, fundada il 1962, s'engascha per mantegnair il caracter natural da la val ed emprova d'intermediar tranter ils basegns da la populaziun indigena e quels dals turists.

## Lais da l'Engiadin'Ota

Cuntrada da lais dal temp postglazial che s'extendevan oriundamain senza interrupziun da San Murezzan fin a Malögia. Als lais da l'Engiadin'Ota appartegnan il Lej da Segl, il Lej da Silvaplana, il Lej da Champfèr ed il Lej da San Murezzan. Cun ina surfatscha da 4,14 km<sup>2</sup> ed ina

profunditad maximala da 71 m è il Lej da Segl il lai il pli grond dal Grischun. Il Lej da Silvaplana ha ina surfatscha da 2,65 km<sup>2</sup> ed ina profunditad maximala da 77 m, quel da Champfèr ina surfatscha da 0,67 km<sup>2</sup> ed il Lej da San Murezzan è il pli pitschen.

Il 1288 ha l'uvestg da Cuir cedi ses dretgs sin ils lais da San Murezzan, Staz e Giazöl en fittanza ereditara a la famiglia de Planta. Lur tschains da fittanza, incasads dals 15 d'avrigl fin la fin da settember, importavan enturn il 1400 500 peschs (da consegnar mintgamai il venderdi); fittadins pli pitschens da la regiun avevan da consegnar tut en tut 3225 peschs l'onn. Ils Artitgels da Glion dal 1526 han privà l'uvestg da ses dretgs sin il Lej da Segl. Il 1869 ha Johannes Badrutt cumprà ina part dals dretgs da pestga sin il Lej da Segl, acquistads il 1943 da la vischnanca da Segl. Ina pitschna part dals dretgs da pestga è anc oz en possess privat. La pestga pratitgada sin ils lais da l'Engiadin'Ota sco era en l'En ed en il Lej da Giazöl ha furmà in'impurtanta funtauna da nutriment fin viaden il 19avel tschientaner.

Il 1934 ha refusà il Tribunal federal suenter lungas cuntraversas fitg animadas ils projects per ovras idraulicas preschenads ils onns 1905 e 1918. Il 1946 ha la Cumünanza Pro Lej da Segl rimnà 100 000 frs per Segl e 200 000 frs per Stampa per reducir la perdita da gudogn che quellas duas vischnancas han acceptà cun renunziar a la concessiun proponida per la durada da 100 onns. Era ils plans dal 1882 per ina via d'aua da San Murezzan a Malögia cun ina sclusa tranter San Murezzan Bagn e Champfèr n'èn betg vegnids realisads. Dal 1889–1914 han ins mantegnì in traffic da bartgas a motor sin il Lej da San Murezzan, concessiunà era per il Lej da Segl dapi il 1908. Il Lej da San Murezzan è l'unic lai da l'Engiadin'Ota che vegn explotà dapi il 1887 per la producziun d'electricitad. Oz servan ils lais als pli divers sports da stad (navigaziun cun bartgas a vela, surfing, pestga e.a.) e d'enviern (cursas da chaval, passlung, patinadi, polo e.a.). Dapi il 1966 s'engascha la Pro Surlej per la protecciun da l'entira cuntrada da lais.

Adolf Collenberg

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.